

04/06/2004

PM syor Asia Timur bentuk usaha sama ekonomi

By Mior Kamarul Shahid

TOKYO: Datuk Seri Abdullah Ahmad Badawi semalam menyarankan kerajaan di Asia Timur bertindak secara proaktif melancarkan satu bentuk usaha sama Integrasi Ekonomi Serantau (IES) untuk kesejahteraan rantau ini.

Perdana Menteri berkata, matlamat jangka panjang IES ialah mencipta bentuk Ekonomi Asia Timur, berbeza dengan yang diamalkan negara Kesatuan Eropah (EU).

"Saya percaya matlamat jangka panjang yang praktikal seharusnya berasaskan kepada `kekurangan EU dan kelebihan Asean', dengan menolak aspek tidak perlu, menyusahkan atau tidak produktif sebagaimana wujud dalam EU," katanya.

Beliau menegaskan demikian ketika menyampaikan ucapan bertajuk `Integrasi Serantau Asia - Melakukan Lonjakan Besar' pada Persidangan Antarabangsa Nikkei ke-10 bertemakan `Masa Depan Asia' di sini, semalam.

Persidangan anjuran Nihon Keizai Shinbon Inc sejak 1995 itu bagi menggalakkan pertukaran pendapat yang bebas untuk mewujudkan persefahaman rakyat di rantau ini.

Turut mengambil bahagian ialah bekas Perdana Menteri, Tun Dr Mahathir Mohamad; bekas Presiden Filipina, Fidel Ramos dan bekas Perdana Menteri Jepun, Yasuhiro Nakasone dan Menteri Kanan Singapura, Lee Kuan Yew serta bekas Perdana Menteri Vietnam, Fan Van Khai.

Menggariskan cara memajukan IES bagi Asia Timur, Abdullah menegaskan pentingnya wujud suasana yang kondusif dengan memastikan segala keperluan seperti keselamatan, kesejahteraan, kestabilan dasar, ketelusan dan peraturan undang-undang.

"Kita perlu majukan bidang ekonomi, pelbagai kerjasama lain dan integrasi yang memberi kesan limpahan positif.

"Kita seharusnya fokus terhadap projek yang menjanjikan faedah kepada semua, bukan segelintir di kalangan kita saja.

"Biasanya adalah lebih baik memulakan sesuatu yang kecil dan memperluaskannya daripada melakukan sebaliknya - mula dengan besar dan kemudian mengecut," katanya.

Abdullah berkata, IES yang kukuh dalam bidang ekonomi boleh diperluaskan ke bidang kewangan, pelajaran, kesihatan, buruh, sains, teknologi dan alam sekitar serta menjadi integrasi serantau Asia Timur lebih komprehensif mencakupi bidang ekonomi lebih luas kepada politik dan diplomasi.

Abdullah berkata, ada 190 perjanjian perdagangan bebas antarabangsa yang membabitkan anggota pertubuhan perdagangan sedunia (WTO) ketika ini.

Selain Kawasan Perdagangan Bebas Asean (Afta), kerajaan di Asia Timur pada hakikatnya hampir tidak membabitkan kerjasama kerajaan walaupun mempunyai integrasi perdagangan yang besar.

Beliau berkata, pada masa ini juga tidak kurang daripada 44 perjanjian kerjasama perdagangan atau berkaitan perdagangan yang dirundingkan baru-baru ini, sedang dirunding atau akan dirunding tidak lama lagi membabitkan ekonomi Asia Timur.

Perdana Menteri juga menegaskan pentingnya usaha meneruskan usaha penubuhan sebuah institusi kewangan Asean sebagaimana dicadangkan oleh Jepun ketika kewangan Asia Timur menghadapi krisis baru-baru ini.

Langkah awal yang patut diambil ialah berpandukan kepada usaha Chiangmai untuk menggerakkan penubuhan Institusi kewangan Asean.

Katanya, Institusi Kewangan Asia tidak sepatutnya bertelagah dan menggantikan Tabung Mata Wang Antarabangsa sebagaimana Bank Asia tidak

bertelagah dan mengambil alih tempat Bank Dunia.

"Jelas, institusi kewangan itu boleh memerhati Asia bukan saja apabila berlaku keadaan bahaya dan krisis melanda tetapi atas dasar 24 jam sehari, tujuh hari seminggu, 365 hari setahun dengan mudah boleh dijustifikasikan.

"Jika masih ada keraguan berhubung penubuhan institusi itu, kita seharusnya dengan serius menimbang untuk mewujudkan segera kumpulan pemikir, institusi kewangan masyarakat Asian, sebagai mempelopori ke arah institusi kewangan Asian," katanya.

Abdullah berkata, mesyuarat tahunan pemimpin Asean+3 - Jepun, China dan Korea - adalah penting dari segi simbolik, diplomatik dan politik tetapi perlu mencetuskan idea kreatif dan produktif untuk memberi kandungan konkrit dan bermakna seperti menjadikan IES ke tahap lebih tinggi dan arah baru.

"Integrasi Asia Timur tidak menuntut perjanjian seperti Perjanjian Rome. Ia juga tidak memerlukan kewujudan 'Asiancrats' menyamai 'Eurocrats' di Brussels," katanya.

Beliau berkata, selain perdagangan dan kewangan, Asia Timur perlu mewujudkan kerjasama dan integrasi dalam bidang kesihatan, sains dan teknologi, buruh dan alam sekitar.

Langkah agresif harus diambil untuk memajukan pelancongan dan pendidikan serantau kerana kedua-duanya penting untuk mengurangkan jarak psikologi dan budaya.

Perdana Menteri berkata, cabaran pemimpin pada abad akan datang adalah membina masyarakat yang amanah, mesra dan aman di Asia Timur.

"Berbeza dengan keadaan beratus lalu, keadaan keamanan hari ini benar-benar berlandaskan kepercayaan, persahabatan dan keamanan - keamanan sebenar di rantau ini.

"Toleh ke belakang 60 tahun kepada Perang Pasifik, 50 tahun Perang Korea, 40 tahun Perang Vietnam. Jangan lupa perang saudara di China, Korea, Vietnam, Laos, Kampuchea, Thailand, Malaysia, Indonesia, Filipina. Jangan lupa perang Vietnam ke atas Kampuchea dan Perang China ke atas Vietnam," katanya.

(END)